



diterbitkan oleh jabatan penerangan malaysia

REF. 1/76/126(1.1.1)

RECORDED: Tidak boleh disiarkan atau diterbitkan sebelum
pukul 5.00 petang, pada 21hb. Januari, 1976.

UCAPAN Y.A.B. DATUK HUSSEIN ONN, PERDANA
MENTERI, KETIKA MENGEMUKAKAN USUL MERAKAMKAN
UCAPAN TAKZIAH DI ATAS BERPULANGNYA KE
RAHMATULLAH TUN HAJI ABDUL RAZAK BIN DATUK
HUSSEIN DI DEWAN NEGARA PADA HARI RABU,
21HB JANUARI, 1976 JAM 2.30 PETANG

Tuan Yang di Pertua,

Saya mohon mengemukakan suatu usul "bahawa Dewan ini merakamkan perasaan dukacita yang amat sangat di atas berpulang-nya ke Rahmatullah Allahyarham Yang Amat Berhormat Tun Haji Abdul Razak bin Hussein dan menyampaikan ucapan takziah kepada Toh Puan Hajjah Rahah dan keluarganya."

Tuan Yang di Pertua,

2. Pada hari Rabu, 12 Muharram 1396 bersamaan 14hb Januari, 1976, dengan kehendak Allah s.w.t. Malaysia dan rakyatnya telah kehilangan seorang patriot dan pahlawan bangsa, seorang negarawan, seorang pemimpin ulung yang dihormati dan disayangi, seorang bapa kepada satu keluarga, iaitu Y.A.B. Perdana Menteri kita Tun Haji Abdul Razak.

3. Sebagai sahabat karib dan rakan seperjuangan saya, malah kepada seluruh negara, kematian Allahyarham merupakan satu kehilangan yang paling besar, satu kehilangan yang sukar dicari ganti. Sekalipun demikian, kita penuh syukur ke hadzrat Allah kerana cubaan yang dihadapi oleh negara ini tentulah mempunyai hikmat dan rahmat disebaliknya. Marilah kita berdoa semoga Allah mencucuri rahmat dan rahimNya ke atas roh Allahyarham di kalangan Shuhadah dan Salihin.

Tuan Yang di Pertua,

4. Sifat-sifat kepimpinan dan kebijaksanaan Allahyarham Tun Abdul Razak merupakan beberapa aspek kehidupan yang bukan sahaja disanjung dan dihormati oleh rakyat Malaysia yang berbilang bangsa dan ugama, tetapi juga disayangi dan dihormati oleh rakyat serta pemimpin negara-negara jiran dan dunia amnya
5. Dalam hubungan inilah, Tuan Yang di Pertua, saya bangun dalam Dewan yang mulia ini memberikan penghormatan kepada seorang Parliamentarian bekas Ahli Dewan Rakyat dari Kawasan Pekan dan Perdana Menteri Malaysia yang kedua, iaitu Allahyarham Tun Haji Abdul Razak bin Dato' Hussein.
6. Seperti yang bakal diriwayatkan oleh para pensejarah kelak, setiap detik perjuangan hidupnya dan jasa-jasa Allahyarham kepada negara akan dirakamkan dengan tinta emas untuk warisan jenerasi masa hadapan. Sungguhpun Allahyarham Tun Abdul Razak telah meninggalkan kita kira-kira tujuh hari yang lalu, tetapi kenyataan ini masih belum dapat diterima oleh rakyat ramai. Bahkan kita masih dapat merasakan betapa hampirnya kita dengan Allahyarham dari segi masa dan waktu untuk menghargai seluruh jasa dan khidmatnya ataupun untuk menyedari sejauh mana kehilangan Allahyarham itu merugikan negara kita Malaysia dan juga dunia seluruhnya.

Tuan Yang di Pertua,

7. Saya adalah seorang yang benar-benar hampir dengan Allahyarham Tun Razak, baik dari segi pertalian keluarga mahupun sebagai seorang sahabat dan rakan seperjuangan dalam UMNO. Buat diri saya, Allahyarham adalah seorang yang jujur, penuh azam, berhemah tinggi tetapi sederhana dalam kehidupannya dan seorang pemimpin yang berjiwa rakyat. Falsafah hidupnya ialah untuk sentiasa berbakti kepada bangsa dan negara "and with malice towards none, with charity for all". Allahyarham sentiasa menunjukkan kasih, bersifat sabar dan tidak ingin bermusuhan dengan sesiapa. Samada dalam hubungan sesama manusia ataupun antara negara, ia sentiasa cuba berikhtiar mewujudkan persahabatan dan mencari jalan tolak ansur dan damai, dalam semua masaalah. Ini terbukti dengan kejayaannya memulihkan hubungan antara Malaysia dan Indonesia dan mengeratkan semula jalinan persahabatan antara kedua negara setelah mengalami zaman gelap selama beberapa tahun. Dalam segala tindakannya, Allahyarham, seberapa boleh, menjaga perasaan seseorang supaya tidak tersinggung. Kalaupun ia terpaksa mengambil sesuatu tindakan tegas dan keras, Allahyarham itu melakukannya dengan perasaan yang amat berat.

8. Dalam falsafah politiknya Allahyarham sentiasa ingat kepada kata-kata Lord Acton iaitu "Power corrupts, and absolute power corrupts absolutely". Walaupun demikian, Allahyarham telah membuktikan bahawa kata-kata itu tidak tepat dan ada kecualinya. The late Tun Razak has proved that there are exceptions to the rule. In fact, Tun Razak himself was an exception to the rule.



diterbitkan oleh jabatan penerangan malaysia₄ -

9. Mengenai kejayaan hidupnya, bolehlah dikatakan Allahyarham telah mencapai kejayaan yang sangat gemilang. Sejak di bangku sekolah lagi ia telah membuktikan kebolehannya dalam bidang pelajaran dan di lapangan sukan. Allahyarham adalah angkatan pertama Pegawai Pentadbir Melayu memasuki Raffles College tetapi terbantut oleh kerana peperangan.
10. Allahyarham lulus ilmu Undang-Undang dalam masa 18 bulan sahaja, satu tempoh yang paling singkat. Dalam pergolakan hidupnya dan perjuangan politiknya, ia mencapai puncak kejayaan dalam tempoh yang singkat juga. Allahyarham menjadi Ketua Pergerakan Pemuda UMNO dalam usia 28 tahun. Menjadi Timbalan Presiden UMNO ketika berusia 29 tahun, menjadi Setiausaha Kerajaan Negeri Pahang ketika berumur 30 tahun, menjadi Menteri Besar Pahang ketika umurnya 33 tahun, menjadi Menteri Pelajaran Pusat pada umur 34 tahun, dilantik menjadi Timbalan Perdana Menteri ketika berumur 35 tahun dan akhirnya menjadi Perdana Menteri ketika berusia 48 tahun. Tidak syak lagi, kejayaan yang dicapainya itu sukar dibandingkan dan patut menjadi contoh tauladan dan inspirasi kepada golongan dan angkatan muda di tanah air kita pada masa ini dan pada masa akan datang.
11. Sekalipun Allahyarham telah mencapai mercu kejayaan hidup dan memegang kuasa politik mutlak, tetapi ia sekali-kali tidak mabuk kuasa. Ini terbukti dalam masa darurat, Peristiwa 13 Mei dahulu, dalam mana beliau berkuasa penuh sebagai Pengarah National Operations Council (MAGERAN), tetapi ia tidak menggunakan kuasa mutlaknya itu dengan sewenang-wenangnya, malah sebaliknya telah mengembalikan kuasa kepada rakyat sebaik sahaja selesai tugasnya memulihkan keamanan dan ketenteraman dalam negara.

Rancangan-rancangan kemajuan tanah Felda yang luasnya beratus ribu ekar telah membawa kehidupan yang lebih sempurna kepada rakyat yang tidak berpeluang. Rancangan-rancangan raksaksa yang sedang diusahakan pada masa ini di Jengka, di Pahang Tenggara, Johor Tenggara dan Trengganu Tengah adalah hasil dari pemikiran Allahyarham dan inilah antara kesan-kesan yang diwariskannya kepada negara dan jenerasi dakan datang.

15. Di lapangan pelajaran, Allahyarham sebagai Menteri Pelajaran yang pertama telah mempelopori Dasar Pelajaran Kebangsaan yang menuju kepada wujudnya perpaduan menerusi satu sistem pelajaran yang disatukan. Hasil dari dasar ini jelas kelihatan sekarang dengan timbulnya masyarakat baru yang berfikir, bertindak sebagai warganegara Malaysia yang tulin. Universiti Kebangsaan Malaysia di mana Allahyarham menjadi Cansellor yang pertama adalah mercu dari Dasar Pelajaran Kebangsaan itu.

16. Samasa Allahyarham mengetuai Kerajaan, buat pertama kali dalam sejarah, negara mempunyai falsafah iaitu Rukunegara. Begitu juga Dasar Ekonomi Baru yang menjadi landasan Rancangan Malaysia Kedua adalah hasil ilham kepada Allahyarham yang bertujuan merapatkan jurang ekonomi antara kaum dan telah mendorong kepada perkembangan ekonomi yang sihat demi mewujudkan satu masyarakat adil, makmur dan bersatu padu. Pengajaran pahit yang didapati selepas Peristiwa 13 Mei sangat menyentuh hatinya dan dalam usaha membentuk satu masyarakat Malaysia yang berdisiplin, yang memahami cita-cita kebangsaan, Allahyarham telah berjaya meletakkan asas perpaduan negara menerusi Rukunegara.

Tidak ramai pemimpin dalam sejarah dunia yang berbuat demikian; sebaliknya ada pula yang mengambil kesempatan menggunakan kuasa untuk kepentingan diri.

12. Sepanjang yang saya tahu, Allahyarham Tun Razak tidak pernah bersikap bongkak dan bertindak sesuka hati kerana beliau berpegang kepada hakikat bahawa kuasa bukanlah suatu nikmat tetapi sebagai satu tanggungjawab. To him power is not a glory but a responsibility. kepadanya, kuasa mutlak ialah tanggungjawab mutlak, - - - absolute power is absolute responsibility, iaitu satu beban yang paling berat untuk dipikul oleh seseorang pemimpin dalam satu jangka waktu yang tidak ditetapkan.

13. Sebenarnya, Tun Razak boleh menggunakan kuasa untuk kesenangan dirinya tetapi ia tidak pernah menyeleweng daripada pegangan hidupnya yang jujur dan serba sederhana itu. Pernah Allahyarham menyatakan bahawa hasrat dirinya, selepas menyempurnakan tanggungjawab kepada negara ialah untuk bersara dan tinggal sebagai rakyat biasa di sebuah kampung di tepi Sungai Pahang.

Tuan Yang di Pertua,

14. Seperti yang kita ketahui, Allahyarham telah menumpukan seluruh hayatnya semata-mata berkhidmat dengan tidak mengenal penat lelah, tanpa menghiraukan kesihatan diri untuk rakyat dan negara. Sebagai pemimpin rakyat, ia telah mempelopori gerakan pembangunan luar bandar semenjak dari tahun lima puluhan dahulu. Hasil dari usahanya inilah kita melihat perubahan wajah kawasan luar bandar yang ketinggalan terbiar semenjak zaman penjajah dengan pembinaan kemudahan-kemudahan asas seperti jalanraya, mesjid, taliair, bekalan letrik, projek-projek pembangunan besar dan kecil.

16. Dalam bidang hubungan luar negeri, Allahyarham Tun Razak, dengan kerjasama dan sokongan rakan-rakan dalam ASEAN, telah berjaya meneroka jalan menuju ke arah wujudnya rantau Asia Tenggara yang berkecuali, aman dan stabil. Dalam konteks ini, bolehlah dianggap "The late Tun Razak was a prince of peace". One of his deepest hopes was that the nations of Southeast Asia and the world would be able to forsake conflict and violence and to live together in peace and harmony despite differences in ideology and social system. He was convinced that Southeast Asia needed peace badly so that all the people's energies could be channeled into socio-economic construction and development. Pendeknya, dasar luar yang dipeloporkannya ialah untuk berbaik-baik dengan semua negara yang ingin bersahabat dengan Malaysia tidak kira apa jua sistem sosial atau ideoloji mereka.

17. Di akhir hayatnya, sekalipun Allahyarham uzur, tetapi ia masih lagi berazam untuk meneruskan usaha dan cita-citanya mengekalkan keamanan di Asia sehinggalah tiba saat ianya dipanggil menemui Tuhannya. Allahyarham kembali dalam usia yang masih muda - - - 53 tahun - dalam saat-saat negara masih memerlukan khidmat dan pimpinannya, di tengah-tengah keazamannya masih memuncak hendak meneruskan cita-citanya yang belum selesai itu.

Tuan Yang di Pertua,

18. Seperti yang saya sebutkan tadi, kita masih terlalu hampir dari segi masa, kepada Allahyarham untuk memberikan penilaian yang mendalam akan peranan dan jasa baktinya dalam usaha membentuk negara Malaysia moden dan mewujudkan serta memelihara keamanan dan

kesetabilan di Asia Tenggara. Mungkin tepat kalau saya sifatkan Allahyarham sebagai, "He was a man of many parts. His achievements are so numerous that only a full-length biography can do justice to him".

19. Saya penuh yakin apabila sejarah Malaysia moden ditulis kelak, tidak syak lagi Tun Razak akan dicatit dalam Buku Sejarah itu sebagai seorang pemimpin besar, seorang statesman, seorang pembentuk dan pelopor gagasan rantau Asia Tenggara yang aman, bebas dan berkecuali.

20. Dalam sejarah negara, Yang Teramat Mulia Tunku Abdul Rahman kita sifatkan sebagai Pengasas Malaysia. Tun Razak telah mengukuhkan asasnya. Dengan kemajuan negara kita yang berkembang pesat, dengan ekonomi yang kukuh, tidak siapa dapat menafikan bahawa sebahagian besar daripada usaha membangun Malaysia itu terletak pada kemimpinan dan vision Tun Razak sendiri.

21. Ringkasnya, kesan-kesan jasa Tun Razak dapat dilihat di mana-mana - dalam pemodenan dan perubahan masyarakat luar bandar; dalam penciptaan sistem pelajaran kebangsaan untuk menyatu-padukan rakyat; dalam pembentukan pasukan keselamatan yang berdisiplin dan utuh; dalam menyatukan sektor ekonomi yang bercorak moden menerusi Dasar Ekonomi Baru malah, di atas segala-galanya, dalam meletakkan asas masyarakat Malaysia yang adil, bersatu padu dan makmur menerusi Rukunegara.

Tuan Yang di Pertua,

22. Dari kisah hidupnya yang penuh dengan ciri-ciri perjuangan dan kejayaan, dari konsep hidupnya yang penuh vision, dari semangat dedikasinya dan keazamannya meneruskan cita-cita negara, rakyat

Malaysia. Marilah kita bersama-sama meneruskan perjuangan yang telah diasaskan oleh pemimpin besar dan negarawan Malaysia yang ulung itu.

23. Sebagai Perdana Menteri yang mengambil alih tugas selepasnya, saya bertanggungjawab mewarisi dan meneruskan amanah yang ditinggalkannya. Saya berikrar kepada Dewan yang mulia ini dan juga kepada negara untuk berusaha dengan sedaya upaya saya memenuhi cita-cita Allahyarham untuk membina sebuah negara Malaysia yang adil, makmur dan bersatu padu, di samping mengekalkan keamanan menerusi dasar berkecuali di rantau Asia Tenggara supaya Malaysia yang kita cintai ini terus mendapat tempat sewajarnya sebagai negara progresif di kalangan dunia antarabangsa.

Tuan Yang di Pertua,

24. Demikianlah saya mengusulkan, terimakasih.

KU.L. LUKUR,
21hb. Januari, 1976. (dikeluarkan pada pukul 10.15 pagi)

HY/na.

PERKHIDMATAN
ARKIB PERDANA MENTERI



- JUN 1976

No Siri	163
No Penerimaan	1/76